



KHUTBAH KHAS HARI ANGKATAN TENTERA MALAYSIA KE - 89 : “KEDAULATAN NEGARA TANGGUNGJAWAB BERSAMA”

الْحَمْدُ لِلّٰهِ الَّذِي أَرْسَلَ رَسُولَهُ بِالْهُدَىٰ وَدِينُ الْحَقِّ لِيُظَهِّرَهُ عَلَى الْدِينِ كُلِّهِ وَلَوْ كَرِهَ
الْمُشْرِكُونَ . أَشْهُدُ أَنْ لَا إِلٰهَ إِلَّا اللّٰهُ وَأَشْهُدُ أَنَّ سَيِّدَنَا مُحَمَّداً عَبْدُهُ وَرَسُولُهُ . اللّٰهُمَّ صَلِّ
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَاصْحَابِهِ وَمَنْ تَبَعَهُمْ بِإِحْسَانٍ إِلَى يَوْمِ
الْدِينِ . أَمَّا بَعْدُ ،
فَيَا عِبَادَ اللّٰهِ ! اتَّقُوا اللّٰهَ حَقَّ تَقَاتِهِ وَلَا تَوْتُنَ إِلَّا وَأَنْتُمْ مُسْلِمُونَ .

Para tetamu Rumah Allah yang dirahmati,

Marilah kita sama-sama mempertingkatkan ketakwaan kepada Allah SWT dengan bersungguh-sungguh melaksanakan segala suruhan-Nya dan menjauhi segala larangan-Nya. Mudah-mudahan kita memperoleh taufik dan hidayah di sepanjang perjalanan hidup ini.

Alhamdulillah, setinggi-tinggi kesyukuran kita panjatkan ke hadrat Allah SWT kerana dengan limpah kurnia serta keizinannya, maka dapat kita sama-sama meraikan sambutan Hari Angkatan Tentera Malaysia ke-89 yang disambut pada 16 September setiap tahun. Tema sambutan Hari ATM pada tahun ini adalah “Kedaulatan Negara Tanggungjawab Bersama”. Sebelum itu, marilah kita merakamkan penghargaan terima kasih kepada semua mantan Panglima Angkatan Tentera Malaysia dan rakan seperjuangan yang telah mendahului kita, kerana mereka lah yang telah meneroka jalan ke arah kecemerlangan masa kini. Insya-Allah, jiwa yang sentiasa bersyukur dan mengenang jasa para pemimpin terdahulu, mampu menimbulkan rasa ketaatsetiaan terhadap pemimpin dan organisasi, sesuai dengan firman Allah SWT:

﴿يَا أَيُّهَا الَّذِينَ آمَنُوا أَطِيعُوا اللَّهَ وَأَطِيعُوا الرَّسُولَ وَأُولَئِكُمْ مِنْكُمْ فِإِنْ تَنَازَعُوا عَنْ شَيْءٍ﴾

﴿فَرُدُّوهُ إِلَى اللَّهِ وَالرَّسُولِ إِنْ كُنْتُمْ تُؤْمِنُونَ بِاللَّهِ وَالْيَوْمِ الْآخِرِ ذَلِكَ خَيْرٌ وَأَحْسَنُ تَأْوِيلًا﴾

Maksudnya: “Wahai orang-orang yang beriman, taatlah kepada Allah dan taatlah kepada rasul dan pemimpin di antara kamu. Maka jika kamu berlainan pendapat tentang sesuatu maka kembalilah kepada Allah dan rasul jika kamu beriman kepada Allah dan hari akhirat. Dan yang demikian itu adalah lebih baik dan lebih elok kesudahannya.” (Surah An-Nisa’ ayat 59)

Para Pejuang yang Dirahmati Allah,

Pada 16 September 2022 yang lalu, merupakan Hari Angkatan Tentera Malaysia ke-89. Pada tarikh ini sememangnya setiap warga Angkatan Tentera Malaysia akan mengingati penubuhan ATM sebagai sebuah organisasi yang diberi kepercayaan tinggi oleh negara untuk mempertahankan kedaulatan negara daripada sebarang ancaman dan pencerobohan serta turut menyumbang kepada keamanan dunia di peringkat antarabangsa.

Marilah kita menghayati dan merenung sedalam-dalamnya akan nikmat kedaulatan negara yang melahirkan kemakmuran dan kesejahteraan yang kita dan negara kecapi sekarang ini. Semua ini, sebenarnya merupakan natijah daripada hasil perjuangan dan pergorbanan seluruh warga Angkatan Tentera Malaysia dan juga masyarakat awam, yang saling bantu membantu bagi memastikan kedaulatan negara kekal terpelihara. Oleh itu, setiap rakyat Malaysia hendaklah sentiasa mempunyai sikap rasa bertanggungjawab, bahawa tugas mempertahankan kedaulatan negara ini bukan hanya dipikul oleh warga ATM sahaja, bahkan tugas ini adalah tugas dan tanggungjawab kita bersama, yang selayaknya mendapat penghargaan dari segenap

lapisan masyarakat. Sesungguhnya tugas murni dan mulia ini telah lama mendapat pengiktirafan dari Allah SWT melalui firmannya dalam surah At-Taubah ayat 111:

﴿إِنَّ اللَّهَ اشْتَرَى مِنَ الْمُؤْمِنِينَ أَنفُسَهُمْ وَأَمْوَالُهُمْ بِأَنَّ لَهُمُ الْجَنَّةَ ۝ يُقَاتِلُونَ فِي سَبِيلِ اللَّهِ فَيَقْتُلُونَ وَيُقْتَلُونَ﴾

Maksudnya: “Sesungguhnya Allah telah membeli dari orang-orang yang beriman jiwa dan harta mereka dengan balasan bahawa mereka akan beroleh syurga, disebabkan mereka berjuang pada jalan Allah, maka diantara mereka ada yang membunuh dan terbunuh.”

Para Pejuang yang Dikasihi Allah,

Dalam tempoh usia ATM yang ke- 89 tahun ini, Angkatan Tentera Malaysia telah banyak melakarkan kejayaan-kejayaan dalam pengoperasiannya, khususnya dalam konteks sumbangannya mewujudkan keamanan dan keharmonian dalam negara dan juga masyarakat antarabangsa. Antara kejayaannya dalam menjaga perbatasan negara ialah, dengan mengekalkan operasi di kawasan sempadan daratan, lautan dan udara bagi memastikan tiada sebarang unsur pencerobohan berlaku. Begitu juga ATM turut berperanan bersama agensi-agensi kerajaan yang lain dalam membantu menjaga keamanan dalam negara seperti bantuan kepada mangsa banjir dan juga usaha memerangi wabak COVID-19 yang telah melanda negara. Di peringkat antarabangsa pula, ATM telah memberi perkhidmatan yang cemerlang di bawah panji Pertubuhan Bangsa-bangsa Bersatu dalam usaha menjaga ketenteraman dan keamanan sangat. Semua usaha yang dilakukan ini merupakan tugas yang murni disisi agama yang sudah pasti akan diganjari dengan ganjaran yang baik daripada Allah SWT. Sabda Nabi SAW yang bermaksud:

“Allah SWT telah menjamin bagi orang yang pergi berjihad di jalan Allah di mana keluarnya itu kerana imannya pada ku dan membenarkan risalah ku, maka aku mengembalikannya pulang ke rumahnya membawa kemenangan berupa pahala dan harta rampasan atau aku akan memasukkannya ke syurga.” (Riwayat Bukhari dan Muslim)

Islam merupakan agama yang mengutamakan toleransi dan kerjasama, dalam waktu yang sama menolak sikap prasangka negatif yang boleh melemahkan kekuatan dan keutuhan umat Islam. Oleh itu, kebersamaan dalam perjuangan merupakan faktor utama dalam menentukan kejayaan sesuatu penugasan. Sesungguhnya apabila jalinan ukhuwah yang kukuh dan jitu ini dapat direalisasikan, ia mampu meringan dan memudahkan beban pelaksanaan tugas yang diamanahkan. Dalam konteks betapa pentingnya kebersamaan dan kesepaduan ini digarapkan, Nabi Muhammad SAW pernah bersabda yang bermaksud:

“Perumpamaan orang mukmin itu dalam mesra memesrai, kasihan belas dan berkasih sayang seperti sebatang tubuh. Apabila satu anggota mengadu kesakitan seluruh anggota yang lain akan merasai sakit dan berjaga malam.”

(Hadis Riwayat Muslim)

Mafhum daripada hadis ini menunjukkan bahawa, semangat kebersamaan, setiakawan atau kesatuan ini, perlu diterapkan pada sebilang masa, agar warga angkatan tentera dapat berdiri teguh sebagai satu angkatan yang di hormati dan digeruni oleh musuh.

Warga ATM yang dirahmati Allah,

Keamanan, kesejahteraan dan kedamaian yang kita kecapi hari ini bukanlah sesuatu yang mudah untuk diperolehi dan dikecapi, malah ianya didirikan di atas pengorbanan para pejuang terdahulu yang sanggup berjuang demi negara tercinta. Oleh itu, ketahuilah bahawa perjuangan dan pengorbanan yang diberikan amat tinggi nilainya. Warga tentera yang memiliki kekuatan akan mampu bersaing dari pelbagai sudut dan sudah tentu akan terbinalah kekuatan seimbang yang sukar dibolosi lawan. Kekuatan yang dimaksudkan itu ialah kekuatan iman, yang padanya tempat bersandar dan penolong dalam memudahkan segala kesulitan.

Sejarah permulaan Islam telah membuktikan bahawa tentera Islam tidak punya kekuatan kebendaan jika dibandingkan dengan musuh-musuh Islam, namun kemenangan tetap digenggami tentera Islam. Ini kerana mereka mempunyai kekuatan rohani yang isinya adalah iman dan takwa yang menghasilkan pengorbanan kudus dan tulus hanya kerana Allah SWT. Allah SWT berfirman di dalam Al-Quran melalui surah Al-Anfal ayat 9:

﴿إِذْ تَسْتَغْيِثُونَ رَبَّكُمْ فَاسْتَجَابَ لَكُمْ أَنِّي مُمْدُّ كُمْ بِأَلْفٍ مِّنَ الْمَلَائِكَةِ مُرْدِفِينَ﴾

Maksudnya: “(Ingatlah) ketika kamu memohon pertolongan kepada tuhan kamu, lalu ia perkenankan permohonan kamu (dengan firmannya) sesungguhnya Aku akan membantu kamu dengan seribu (bala tentera) dari malaikat yang datang berturut-turut.”

Kekuatan rohani dan penjanaan peribadi muslim sejati mampu dibina dengan latih tubi yang telah digariskan oleh Allah SWT. Penghayatan dan pelaksanaan ajaran Islam yang sempurna juga, mampu membentuk anggota yang berdaya saing, tahan lasak dan memiliki keperibadian yang positif. Bagi merealisasikan matlamat

tersebut, maka peranan ilmu jangan sekali-kali dipinggirkan. Allah merakamkan di dalam Al-Quran melalui surah Al-Baqarah ayat 249:

﴿قَالَ الَّذِينَ يَضْنُونَ أَنَّهُمْ مُلَاقُوا اللَّهَ كَمْ مِنْ فَتَةً قَلِيلَةً غَلَبَتْ فَتَةً كَثِيرَةً بِإِذْنِ اللَّهِ وَاللَّهُ مَعَ﴾

الصَّابِرِينَ

Maksudnya: “Berkata pula orang-orang yang yakin bahawa mereka akan menemui Allah berapa banyak (yang pernah terjadi) golongan yang sedikit berjaya menewaskan golongan yang banyak dengan izin Allah, dan Allah sentiasa bersama-sama orang yang sabar.”

Saf Pejuang yang Dikasihi Allah SWT Sekalian,

Bagi menentukan keunggulan warga angkatan tentera agar sentiasa terpelihara, mimbar menyeru kepada semua, agar berkhidmat dengan cemerlang. Laksanakanlah tugas dengan sebaik mungkin. Kita harus mengakui bahawa kita adalah golongan yang profesional dan sebagai seorang yang profesional, kita mesti sentiasa menjaga imej Angkatan Tentera Malaysia. Demi untuk menentukan warga tentera terus unggul dan relevan, mimbar menyeru semua lapisan anggota untuk sentiasa muhasabah diri dan memiliki jati diri yang tinggi dan menilai pencapaian masing-masing terhadap usaha-usaha untuk memperkuatkan lagi organisasi Angkatan Tentera Malaysia agar lebih dihormati dan disegani oleh segenap masyarakat dan negara.

Sebagai penutup kepada khutbah hari ini, saya ingin merumuskan khutbah kepada beberapa intipati penting untuk panduan bersama.

Pertama. Kita hendaklah bersyukur akan nikmat kedaulatan negara yang kita rasai sekarang ini. Oleh itu, tanamkanlah niat perjuangan semata-mata untuk mencari

keredhaan Allah SWT di dalam menegakkan agamanya dan bertekad untuk mempertahankan kedaulatan dan keamanan negara.

Kedua. Seluruh warga tentera dan masyarakat awam hendaklah berganding bahu dan bekerja sama agar sama-sama dapat berperanan dalam menentukan kedaulatan negara sentiasa terpelihara.

Ketiga. Gabungan barisan kepimpinan yang efektif, pengurusan yang berkualiti, ketaatsetiaan yang tidak berbelah bagi. Berpegang dengan prinsip berjuang bersama sudah pasti ianya akan melakar sebuah kejayaan dalam perjuangan.

Keempat. Elemen ilmu, iman dan takwa sangat penting untuk membentuk dan melahirkan anggota yang berdaya juang dan mempunyai kekuatan rohani yang ampuh untuk menghadapi cabaran dalam perjuangan.

Firman Allah SWT,

﴿إِنَّ اللَّهَ يُحِبُّ الَّذِينَ يُقَاتِلُونَ فِي سَبِيلِهِ صَفَّا كَانُوهُمْ بِنِيَّانٍ مَرْصُوصُ﴾

Maksudnya: “Sesungguhnya Allah menyukai orang yang berperang dijalan-Nya dalam barisan yang teratur seakan-akan mereka seperti suatu bangunan yang tersusun ampuh.”

بَارَكَ اللَّهُ لِيْ وَلَكُمْ فِي الْقُرْءَانِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ،
وَتَقْبِلَنِي وَمِنْكُمْ تَلَاقِتُهُ إِنَّهُ هُوَ السَّمِيعُ الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِيْ وَلَكُمْ،
وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ، فَيَا فَوْزَ الْمُسْتَغْفِرِينَ وَيَا نَجَاهَةَ
التَّائِبِينَ.